



Na Silvia H. Allred

Tauturu Matamua i roto i te
Peresideniraa Rahi o te Sotaiete Tauturu

Te Auraa o te Ti'araa Pīpī

*Ia riro ana'e te here ei ture arata'i no tatou i roto i te
aupururaa ia vetahi ê, ua riro ia ta tatou taviniraa
ia ratou ei evanelia ohipa.*

Mai mutaa iho maira to te Fatu haapiiraa mai e, ei aau hoê e te mana'o hoê to tatou e riro ai tatou ei mau taata No'na.¹ Ua haapii atoa mai te Faaora e, na faauerā rahi i roto i te ture ra, maori râ, « Ia here i te Fatu to oe Atua ma to aau atoa, e ma to varua atoa, e ma to mana'o atoa », e « e aroha'tu oe i to taata tupu, mai to aroha ia oe iho na ».² E i te hopea, i muri noa iho i te faati'a-raa-hia te Ekalesia, ua faaue mai te Fatu i te feia mo'a e, « ia haere outou i te feia vêvê ra e te feia e ere nei i te tahi mea e e tauturu ho'i ia ratou ia faaorahia'tu ratou ».³

Eaha te tumu parau hoê roa i roto i teie mau faauerā atoa? Teie ia, oia ho'i, e aroha tatou te tahi i te tahi e e tavinii tatou te tahi i te tahi. Tera ia te fâ mau o te ti'araa pīpī i roto i te Ekalesia mau a Iesu Mesia.

Te faahanahana nei tatou i te 75 raa o te matahiti a faati'ahia ai te faanahoraa totauturu a te Ekalesia, e no reira, te faahaamana'o mai nei te reira ia tatou i te mau tumu o te ohipa totauturu, oia ho'i, te tautururaa ia i te mau melo ia tauturu ia ratou iho ia ti'amâ, ia aupuru i te feia vêvê e

te nava'i ore, e ia tavinii. Ua faanaho te Ekalesia i ta'na mau rave'a no te tauturu i te mau melo ia imi i te maitai pae tino, pae varua, pae sotiare, e i te pae o te feruriraa no ratou iho, no to ratou mau utuafare, e no vetahi ê. I roto i te toro'a episekopo, te vai ra te hopoi'a taa ê no te aupuru i te feia vêvê e te nava'i ore, e ia horo'a i taua mau tauturu ra i te mau melo o ta'na paroita. E tauturuhia oia i roto i taua mau ohipa ra e te mau pūpū autahu'araa, te Sotaiete Tauturu, e te mau taea'e hahaere utuafare.

Ua riro tamau noa te Sotaiete Tauturu ei tuhaa faufaa no te ohipa totauturu. I te faati'araa te peropheta Iosepha Semita i te Sotaiete Tauturu i te matahiti 1842, ua parau oia i te mau tuahine e, « teie te haamatarā o te mau mahana maitai no te feia vêvê e te feia ati ».⁴ Ua parau oia i te mau tuahine e, te tumu o te sotaiete « o te tauturu ia i te feia vêvê, i te feia nava'i ore, i te ivi e te otare, e te raverā i te mau ohipa tauturu atoa... E ninii ratou i te hinu e te uaina i roto i te mau aau puta no te ati ; e tamaro ratou i te roimata o te otare, e e faatupu ratou i te oaoa i roto i te aau o te ivi ».⁵

Ua parau atoa oia e, « e ti'a i te Sotaiete ia faarave i te mau taea'e i te ohipa maitai na roto i te imiraa i te mau hinaaro o te feia vêvê—te imiraa i te mau taata e titau ra i te tauturu, e te pahonora i to ratou mau hinaaro ; te tautururaa na roto i te faatiti'aifaraora i te mau mea pae morare e te haapuairaa i te ohipa maitai i roto i te oraraa huiratira ».⁶

I teie anotau, te rave amui nei te tane e te vahine o te Ekalesia no te tauturu i te feia nava'i ore. Te paturu nei te mau taea'e o te autahu'araa i te mau taata e hinaaro nei i te arata'iraa e te tautururaa i te pae varua. E haamaitai te mau taea'e hahaere utuafare faaroo i te oraraa o te utuafare tata'itahi, e e horo'a ia ratou i te mau haamaitairaa o te evanelia. Taa ê atu i te reira, e horo'a atoa ratou i to ratou puai e ta ratou taleni na roto i te tahi atu raverā, mai te tautururaa i te hoê utuafare ia tata'i i to'na fare, mai te tautururaa i te hoê utuafare ia tau i te vahi faaearaa, e aore râ, na roto i te tautururaa i te hoê taea'e ia imi i te ohipa na'na.

E haere te mau peresideni Sotaiete Tauturu e farerei i te mau utuafare, ei mono no te episekopo, no te hi'o i te mau hinaaro o te mau utuafare. E ara maite e e haapa'o te mau taea'e hahaere faaroo i te mau tuahine e te mau utuafare. Pinepine ratou i te riro ei mau taata matamua e pahono i te mau aniraa i te mau taime rû. E horo'a te mau tuahine o te Sotaiete Tauturu i te maa, e rave i te ohipa tavinii aroha, e e horo'a ho'i i te patururaa tamau i roto i te mau taime hepohepo.

Ua oaoa te mau melo o te Ekalesia ati a'e te ao nei i te mau anotau i ma'iri na, e e mea ti'a ia ratou ia oaoa i teie nei, i te mau rave'a e vai nei i roto ia tatou no te tavinii ia vetahi ê. Na roto i ta tatou mau tautoo-amui-raa e tauturuhia ai te feia vêvê, te feia po'ia, te feia mauui, e aore râ, te feia tei roohia i te ati, e na reira tatou e faaora ai i te mau varua.

E ti'a i te mau episekopo atoa ia farii i te hoê fare vairaa faufaa na te Fatu, o te haamauhia na roto i to te mau melo haapa'o horo'araa i te episekopo ra i to ratou taime, ta ratou



taleni, to ratou ite, to ratou aau aroha, ta ratou mau materia e ta ratou mau rave'a moni no te aupuru i te feia vêvê e no te patu i te basileia o te Atua i ni'a i te fenua nei.⁷ E nehenehe tatou paatoa e horo'a no te fare faufaa o te Fatu, na roto i te aufauraa i ta tatou mau ô haapaeraa maa, e na roto i te faaineineraa i ta tatou mau tao'a no te taime e hinaaro ai te episekopo no te tauturu i te feia nava'i ore.

Noa'tu te vitiviti o te tauraa te huru o te ao nei, aita te mau ture o te ohipa totauturu i tau i roto i te roaraa o te tau, no te mea, e mea faauruhia mai te reira no te ra'i mai, e parau mau heheuhia mai. Mai te mea e, e rave te mau melo o te Ekalesia e to ratou utuafare i te mau mea atoa e maraa ia ratou no te tauturu ia ratou iho, e aita te reira e nava'i no te pahono i to ratou mau hinaaro tumu, ua ineine te Ekalesia no te tauturu. E pahono-oioi-hia te mau hinaaro rû, e i muri iho, e faanahohia te hoê rave'a no te tauturu i te taata ia ora ia'na iho. Te oraraa

ia'na iho, o te ti'araa ia o te hoê taata ia imi i te mau mea e titauhia no te oraraa i te pae varua e i te pae tino, no'na iho e no to'na utuafare.

Ia maraa ana'e to tatou iho faito e ora ai tatou ia tatou iho, e haamaraa atoa ia tatou i to tatou ti'araa ia tauturu e ia tavini ia vetahi ê mai te au i ta te Faaora i rave na. Ia tauturu ana'e tatou i te feia nava'i ore, i tei ma'ihia, e i tei mau iui, te pee ra ia tatou i te hi'oraa o te Faaora. Ia riro ana'e te here ei ture arata'i no tatou i roto i te aupururaa ia vetahi ê, ua riro ia ta tatou taviniraa ia ratou ei evanelia ohipa. O te evanelia ia i roto i to'na taime maitai roa a'e. O te haapa'oraa paieti e te ino ore ia.

I roto i ta'u mau ohipa e rave rahi no te Ekalesia, ua tupu te haehaa i roto ia'u i to'u iteraa i te here e i te mana'onao'na ta te mau episekopo e te mau ti'a faatere o te Sotaiete Tauturu i faaite i ni'a i te mau taata ta ratou e tiaau ra. A tavini ai au ei peresideni no te Sotaiete Tauturu i Chili i roto i te mau matahiti 1980, tei roto taua fenua

ra i te fifi i te pae faarava'iraa faufaa i taua taime ra, e tei ni'a te rahiraa o te taata ohipa ore i te faito e 30 i ni'a i te hanere. Ua ite roa vau i te itoito o te mau peresideni Sotaiete Tauturu e te mau tuahine hahaere haapa'o « ma te rave i te maitai »⁸ i roto i taua taime fifi o te oraraa ra. Ua haapa'o ratou i te papa'iraa i roto i te Maseli 31:20, « e hohora oia i o'na pue rima i te taata rii, e ua faatoro hua i te taata vêvê ra ».

Te mau tuahine iho e mea ha'ihai roa'toa ta ratou mau rave'a, ua tauturu tamau atoa ratou i te feia ta ratou i feruri e, e nava'i ore rahi a'e to ratou. I reira to'u haroaroa-maitai-raa i te mea ta te Faaora i ite a parau ai oia i roto i te Luka 21:3-4 :

« Ua parau atu ra oia, e rahi ta teie nei vahine ivi tao'a ore i tuu i roto i ta ratou atoa ra :

« No roto ho'i i ta ratou pueraa tao'a rahi roa ra ta ratou i tuu i roto i te tao'a a te Atua : Area teie nei vahine, ua hope roa a'na pue tao'a rii i te tuuhia e ana i roto ».



Tau matahiti i muri a'e ua ite faahou vau i taua huru ohipa ra a riro ai au ei peresideni Sotaiete Tauturu no te tĩtĩ i te fenua Raparata i te taime a tupu ai te fifi rahi i te pae faarava'iraa faufaa i roto i taua fenua ra, e e rave rahi te mau melo haapa'o tei fifi roa. E ua ite faahou vau i te reira aita i maoro a'e nei i roto i to'u tere i Kinshasa i te fenua Republique Democratique no Congo, i Afirita ; e i Bulawayo i Zimbabwe. Te tamau noa nei te mau melo o te paroita i te mau vahia atoa, te mau tuahine hoa rā no te Sotaiete Tauturu, i te patu i te faaroo, i te faaitoito i te taata e i te mau utuafare, e i te tauturu i te feia nava'i ore.

E ohipa maere mau ia feruri e, e nehenehe ta te hoê tuahine e aore rā, ta te hoê taea'e haehaa roa, i roto i to'na piiraa no te Ekalesia, ia haere i roto i te hoê utuafare vêvê, te oto, te ma'i, e aore rā, te ati, e ia hopoi atu i te hau, te tauturu e te oaoa. Aita e hi'oraa e, o vai te paroita e aore rā, o vai te amaa, e aore rā, eaha te rahi e aore rā, te na'ina'i o te pūpū, e farii te mau melo tata'itahi i taua rave'a ra. E tupu te reira i te mau mahana atoa, e te tupu nei te reira i te hoê vahia i teie iho taime.

E metua vahine apī roa o Karla, e piti a'na tamarii. E mea maoro te ohipa a ta'na tane o Brent e faaoti ai, e e hora taatoa no te haere i ta'na

ohipa e no te ho'i. I muri noa iho i te fanauraa o te piti o ta raua tamahine iti, ua faati'a oia i teie ohipa i tupu : « I te mahana i muri a'e i to'u fariiraa i te piiraa ei tauturu i roto i te Sotaiete Tauturu o ta'u paroita, ua haamata vau i te teimaha i te ohipa. Nahea e ti'a ai ia'u ia amo i te hopoi'a no te tauturu i te aupururaa i te mau tuahine i roto i ta'u paroita, inaha, te amo atoa nei au no te faaoti i ta'u ohipa ei vahine faaipoipoi e ei metua vahine no te hoê tamarii ha'uti e piti matahiti e te hoê aui apī ? A feruri noa ai au i teie mau mana'o, ua ma'ihia a'e ra te tamarii e 2 matahiti. I taua taime ra, ua ti'a maira i te uputa te tuahine Wasden, te hoê o to'u na tuahine hahae, ma te mana'o-ore-hia. No te mea ua riro na oia ei metua vahine no te mau tamarii paari, ua ite maitai oia e, nahea ia tauturu. Ua parau maira oia ia'u i te mea e ti'a ia'u ia rave a haere atu ai oia i te fare hooraa raau no te hoo mai i te tahi mau raau. I muri a'e, ua imi oia i te rave'a ia haerehia e tii i ta'u tane i te vahia tape'araa pereoo auahi, ia ti'a ia'na ia tae oioi mai i te fare no te tauturu ia'u. Na roto i ta'na pahonuraa o ta'u e ti'aturi nei e, na te Varua Maitai i horo'a ia'na i te reira, apitihia i to'na hinaaro mau ia tavini ia'u, na te reira i haapapū faahou mai ia'u e, e tauturu mai Oia ia'u ia rave i to'u piiraa apī ».

Ua here te Metua i te Ao ra ia tatou e ua ite Oia i te huru o to tatou oraraa e to tatou mau aravihi. Noa'itu e, te imi nei tatou i ta'na mau tauturu i te mau mahana atoa na roto i te pure, i te rahiraa o te taime, e mea na roto ia i te tahi atu taata e pahono mai ai Oia i to tatou mau hinaaro.⁹

Ua parau te Fatu e, « O te mea teie e ite ai te taata atoa e, e pipī outou na'u, ia aroha outou ia outou iho ».¹⁰

E itehia te hinaaro mau i te Mesia a horo'a ai tatou i te taviniraa titau ore. Ua riro te tautururaa te tahi e te tahi ei ohipa haamo'a, o te faateitei i te taata e farii e o te faahaehaa i te taata horo'a. E tauturu te reira ia tatou ia riro ei pipī mau na te Mesia.

Ua riro tamau noa te faanahoraa o te ohipa totauturu ei faaohiparaa no te mau ture mure ore o te evanelia. O te horo'araa ia ia au i ta te Fatu faanahoraa. E mata na tatou i te faaapī i to tatou hinaaro ia riro ei tuhaa no te fare vairaa faufaa na te Fatu no te haamaitai ia vetahi ê.

Te pure nei au ia haamaitai mai te Fatu ia tatou tata'itahi ma te horo'a mai ia tatou i te aau maitai, te aroha e te faaherehere. Te taparu nei au ia rahi to tatou hinaaro e to tatou ti'araa ia faatoro i te rima e ia tauturu i te mau taata nava'i ore, tei roohia i te ati e tei mau iui ; ia pahonohia ho'i to ratou mau hinaaro, ia haapaarihia to ratou faaroo, e ia i to ratou aau i te mau-ruuru e te here.

Ia haamaitai mai te Fatu ia tatou tata'itahi a haere ai tatou ma te haapa'o i Ta'na mau faauerua, Ta'na evanelia, e To'na maramarama. Na roto i te i'oa o Iesu Mesia ra, amene. ■

TE MAU NOTA

1. A hi'o Mose 7:18.
2. A hi'o Mataio 22:36-40.
3. Te Parau Haapiiraa e Te Mau Parau Fafau 44:6.
4. Joseph Smith, in *History of the Church*, 4:607.
5. *Te mau Haapiiraa a te mau Peresideni o te Ekalesia : Joseph Semita* (2007), 452.
6. *Teachings: Joseph Smith*, 452.
7. *Providing in the Lord's Way: A Leader's Guide to Welfare* (1990), 11
8. Te Ohipa 10:38; Te Hiro'a Faaroo 1:13.
9. A hi'o *Te mau Haapiira a te mau Peresideni o te Ekalesia : Spencer W. Kimball* (2006), 82.
10. Ioane 13:35.